

Il Paese della Cuccagna.

CANZONE V.

Coul famos pais d' cocagna
 A l'è peui un gran pais,
 Gnun lavora la campagna.
 Pur a smia un paradis;
 Li chi veul fè 'l gargh lo fassa,
 J'è pa gnun ch'a l'ambarassa,
 Fa nen bsoagn d' travajè
 Pr vagnesse da mangè.

Le stra son tute sternie
 Con d' rubiole e d' piasentin,
 E le pertie son guarnie
 Con d' sautisse e con d' bodin;
 S' i vedeisse le ciovende,
 Loli si ch'a l'è un bel rende!
 Fan d' salam tant desformà,
 Ch'ogni doi fan la somà.

La rosà, ch' ven an campagna,
 L' ha un savor da paradis,
 Coui ch'a tasto coula bagna,
 Si ch'ai fa lechè i barbis;
 Bin ch' 'l sol ai bata ansima,
 Tant a resta giust com' prima,
 Ansi anlora a resta mei,
 Prchè a geila pa i buei.

Ogni smanna a pieuv na vota
 Dij fidei e d' macaron;
 Elo pa una bela bota
 Sempre aveine dij baron?

Fa pa bsogn d'acomodeje,
 J'è la penna mach d'mangieje,
 Son già bei anformagià
 Con so bur e la servià.

An fiocand ai ven d'lasagne
 Larghe tre travers d'di,
 E d'michete a gran cavagne
 Con dij bon maron candi;
 Quand ai ven peui la tempesta,
 Tuti anlora fan gran festa,
 Ch'a l'è tuta mach d'bombon,
 D'ale e d'cheusse d'gros capon.

Dla polenta bela e consa
 I fossai son pien a ras,
 Basta andè con una bronsa,
 I na pie fin ch'a v'pias;
 J'è squasi gnun ch'a na toca,
 Bin ch'a fonda tuta an boca,
 Fora cousti senza dent,
 Ch'a na mangio alegrement.

Le nosere fan d'quajète,
 Basta andeje destachè;
 E le roui caria d'tartlète,
 Pi ai na tomb, e pi ai na j'è;
 I morè cuvert d'ofele,
 E j'arbron guerni d'giambele,
 E le trifole semnà
 Son le dmore dle masnà.

S'i voli d'roba candia,
 Andè antorn dle bussonà,
 A l'è pa tabornaria,
 J'è da fene d'linsolà;
 A j'è pa nissune ronze,
 Nè d'spinne da feve punze,
 Piene pura dle carà
 Con man nua e j'eui sarà.

Ma s' a v' pias d' roba pi finna,
 V'assicur ch' ai manca nen,
 D' mandolasse a la plarinna
 A na j' è d' ij erbo pien;
 Sa l' è pr d' pastissaria,
 I v' na leve dlong l' anvia,
 Andè mach ant i rivass,
 I na treuve minca 'n pass.

Quand i veule peui trateve
 Tant al di com' a la neuit,
 Prontè mach 'l tavo e steve,
 Ch' j' oseï venno bei e cheuit,
 Le pernis e le becasse
 Son comune com' d' lumasse;
 I polastr e colombot
 Son pi spas ch' i passarot.

D' ogni part ai cor d' fontanne
 Ch' a fan tute cabarat,
 Portè manch dle coupe o d' sanne
 Pr ciucè del vin ciarat;
 Moscatel e malvasia,
 E peui ancor del mei ch' ai sia;
 L' è un bel comod a cimpè
 Senza spende pa 'n doi dne.

D' vote mai pr gargaria
 I veuleisse ste a durmi,
 Ste sigur, gnun a v' desvia,
 Fuslo pura gros mesdi;
 Accogia ch' i sie ant la stansa
 Ronfè pur a cherpa pansa,
 L' è la moda del pais
 Ognun fa com' a j' è vis.

S' quaicadun ai veul andeje,
 Venna si amparè la stra,
 Ma l' è cosa da penseje,
 Ch' a l' è pa una folairà,

Prchè venta sempre core
 Pr des agn e quindes ore,
 Ant 'l dur, e ampò ant 'l mol,
 Ant la pauta fin al col.

**Il Matrimonio della figlia di Martino Potagi
 con Giovanni Pietro Bragari.**

CANZONE VI.

J'è la fia d' Martin Potagi
 Desgagià com' un pajè,
 A stant agn, e d' avantagi
 S'è vojusse ancor mariè.
 A l' ha pià Giamper Bragari,
 Ch'a l'è ancor un bel giovnot,
 A l'avrà senza gran svari
 Quatr borle pr spalot.
 Un piston e una ramassa
 Son i mobil d' soa ca,
 Un linseul e una pajassa
 Con un' erca desfondà.
 L'an avu da fè tre smanne
 Pr anvitè tuti i parent,
 I sotrou e gurarianne,
 Sbiri, boja e gavadent.
 L'an fa 'l past a sta marioira
 Con un pors, ma d' bela sort,
 Ch'a trovèro ant la ratoira
 Pr là dsour sul solè mort.
 A ste nosse s'è comprasse
 Una cara d' vin ciatrat,
 Tuti l'an vist quand a s'è mnasse
 Sigilà ant un bon barlat.